

卷 5 御間城入彥五十瓊殖天皇 崇神天皇

御間城入彥五十瓊殖天皇 稚日本根子彥大日日天皇第二子也 母曰伊香色謎命 物部氏遠祖大綜麻杵之女也
天皇年十九歲 立爲皇太子 識性聰敏 幼好雄略 既壯寬博謹慎 崇重神祇 恆有經綸天業之心焉
六十年夏四月 稚日本根子彥大日日天皇崩


元年春正月壬午朔甲午(BC97.01.13) 皇太子即天皇位 尊皇后曰皇太后
二月辛亥朔丙寅 立御間城姬爲皇后 先是 后生活目入彥五十狹茅天皇 彥五十狹茅命 國方姬命 千千衝倭姬命 倭彥命 五十日鶴彥命
又妃紀伊國荒河戶畔女遠津年魚眼眼妙媛【一云 大海宿禰女八坂振天某邊】生豐城入彥命 豐鍬入姬命
次妃尾張大海媛 生八坂入彥命 淳名城入姬命 十市瓊入姬命 是年也太歲甲申

三年秋九月(BC95.09) 遷都於磯城 是謂瑞籬宮

四年冬十月庚申朔壬午(BC94.10.23) 詔曰 惟我皇祖 諸天皇等 光臨宸極者 豈爲一身乎 蓋所以司牧人神 經綸天下 故能世闡玄功 時流至德 今朕奉承大運
愛育黎元 何當聿遵皇祖之跡 永保無窮之祚 其群卿百僚 竭爾忠貞 共安天下 不亦可乎

五年(BC93 年) 國內多疾疫 民有死亡者 且大半矣

六年(BC92 年) 百姓流離 或有背叛 其勢難以德治之 是以 晨興夕惕 請罪神祇
先是 天照大神 倭大國魂二神 並祭於天皇大殿之內 然畏其神勢 共住不安
故以天照大神 託豐鍬入姬命 祭於倭笠縫邑 仍立磯堅城神籬【神籬 此云比莽呂岐】
亦以日本大國魂神 託淳名城入姬命令祭 然淳名城入姬 髮落體瘦而不能祭



七年春二月丁丑朔辛卯(BC91.02.15) 詔曰 昔我皇祖 大啓鴻基 其後 聖業逾高 王風轉盛 不意 今當朕世 數有災害 恐朝無善政 取咎於神祇耶 蓋命神龜以極致災之所由也

於是 天皇乃幸于神淺茅原 而會八十萬神 以卜問之

是時 神明憑倭迹迹日百襲姬命曰 天皇 何憂國之不治也 若能敬祭我者 必當自平矣

天皇問曰 教如此者誰神也 答曰 我是倭國域內所居神 名爲大物主神

時得神語 隨教祭祀 然猶於事無驗

天皇乃沐浴齋戒 潔淨殿內 而祈之曰 朕禮神尚未盡耶 何不享之甚也 冀亦夢裏教之 以畢神恩

是夜夢 有一貴人 對立殿戶 自稱大物主神曰

天皇 勿復爲愁 國之不治 是吾意也 若以吾兒大田田根子 令祭吾者 則立平矣 亦有海外之國 自當歸伏

秋八月癸卯朔己酉 倭迹速神淺茅原日妙姬 穗積臣遠祖大水口宿禰 伊勢麻績君 三人共同夢 而奏言
昨夜夢之 有一貴人 誨曰 以大田田根子命爲祭大物主大神之主 亦以市磯長尾市 爲祭倭大國魂神主 必天下太平矣
天皇得夢辭 益歡於心 布告天下 求大田田根子 即於茅渟縣陶邑得大田田根子而貢之
天皇即親臨于神淺茅原 會諸王卿及八十諸部 而問大田田根子曰
汝其誰子 對曰 父曰大物主大神 母曰活玉依媛 陶津耳之女 亦云 奇日方天日方武茅渟祇之女也
天皇曰 朕當榮樂 乃卜使物部連祖伊香色雄 爲神班物者 吉之 又卜便祭他神 不吉
十一月丁卯朔己卯 命伊香色雄 而以物部八十平瓮 作祭神之物 即以大田田根子 爲祭大物主大神之主
又以長尾市 爲祭倭大國魂神之主 然後 卜祭他神 吉焉
便別祭八十萬群神 仍定天社 國社 及神地 神戶 於是 疫病始息 國內漸謐 五穀既成 百姓饒之

八年夏四月庚子朔乙卯(BC90.04.16) 以高橋邑人活日 爲大神之掌酒【掌酒 此云佐介弭苔】
冬十二月丙申朔乙卯 天皇 以大田田根子 令祭大神 是日 活日自舉神酒 獻天皇 仍歌之曰
許能瀨枳破 和餓瀨枳那羅孺 椰磨等那殊 於朋望能農之能 介瀨之瀨枳 伊句臂佐 伊久臂佐
如此歌之 宴于神宮 即宴竟之 諸大夫等歌之曰
宇磨佐開 瀨和能等能能 阿佐妬珥毛 伊弟氏由介那 瀨和能等能渡塢
於茲 天皇歌之曰
宇磨佐階 瀨和能等能能 阿佐妬珥毛 於辭寐羅箇禰 瀨和能等能渡烏
即開神宮門 而幸行之 所謂大田田根子 今三輪君等之始祖也

九年春三月甲子朔戊寅(BC89.03.15) 天皇夢有神人 誨之曰
以赤盾八枚 赤矛八竿 祠墨坂神 亦以黑盾八枚 黑矛八竿 祠大坂神 四月甲午朔己酉 依夢之教 祭墨坂神 大坂神

十年秋七月丙戌朔己酉(BC88.07.24) 詔群卿曰 導民之本 在於教化也
今既禮神祇 災害皆耗 然遠荒人等 猶不受正朔 是未習王化耳 其選群卿 遣于四方 令知朕憲
九月丙戌朔甲午 以大彥命遣北陸 武渟川別遣東海 吉備津彥遣西道 丹波道主命遣丹波

因以詔之曰 若有不受教者 乃舉兵伐之 既而共授印綬爲將軍

壬子 大彥命到於和珥坂上 時有少女歌之曰【一云 大彥命到山背平坂 時道側有童女歌之曰】

瀾磨紀異利寐胡播擲 飮酒餓鳥塢 志齊務苔 農殊末句志羅珥 比賣那素寐殊望

【一云 於朋耆妬庸利 于介伽卑氏 許呂佐務苔 須羅句塢志羅珥 比賣那素寐須望】

於是 大彥命異之 問童女曰 汝言何辭 對曰 勿言也 唯歌耳 乃重詠先歌 忽不見矣 大彥乃還 而具以狀奏

於是 天皇姑倭迹迹日百襲姬命 聰明叡智 能識未然 乃知其歌怪 言于天皇

是武埴安彥將謀反之表者也 吾聞 武埴安彥之妻吾田媛 密來之 取倭香山土 裏領巾頭 而祈曰

是倭國之物實 則反之【物實 此云望能志呂】是以 知有事焉 非早圖 必後之

於是 更留諸將軍 而議之 未幾時 武埴安彥與妻吾田媛 謀反逆 興師忽至 各分道 而夫從山背 婦從大坂 共入欲襲帝京

時天皇 遣五十狹芹彥命 擊吾田媛之師 即遮於大坂 皆大破之 殺吾田媛 悉斬其軍卒

復遣大彥與和珥臣遠祖彥國葺 向山背擊埴安彥 爰以忌瓮 鎮坐於和珥武金品木坂上 則率精兵 進登那羅山而軍之 時官軍屯聚而躡跟草木 因以號其山曰那羅

山【躡跟 此云布瀾那羅須】更避那羅山 而進到輪韓河 與埴安彥 挾河屯之 各相挑焉 故時人改號其河 曰挑河 今謂泉河訛也

埴安彥望之問彥國葺曰 何由矣 汝興師來耶 對曰 汝逆天無道 欲傾王室 故舉義兵 欲討汝逆 是天皇之命也

於是 各爭先射 武埴安彥 先射彥國葺 不得中 後彥國葺 射埴安彥 中胸而殺焉

其軍衆脅退 則追破於河北 而斬首過半 屍骨多溢 故號其處 曰羽振苑 亦其卒怖走 屎漏于禪 乃脫甲而逃之 知不得免 叩頭曰 我君

故時人號其脫甲處 曰伽和羅 禪屎處曰屎禪 今謂樟葉訛也 又號叩頭之處 曰我君【叩頭 此云迺務】

是後 倭迹迹日百襲姬命 爲大物主神之妻 然其神常晝不見 而夜來矣 倭迹迹姬命語夫曰

君常晝不見者 分明不得視其尊顏 願暫留之 明旦仰欲觀美麗之威儀 大神對曰 言理灼然 吾明旦入汝櫛笥而居 願無驚吾形

爰倭迹迹姬命 心裏密異之 待明以見櫛笥 遂有美麗小蛇 其長大如衣紐 則驚之叫啼

時大神有恥 忽化人形 謂其妻曰 汝不忍令羞吾 吾還令羞汝 仍踐大虛 登于御諸山

爰倭迹迹姬命仰見 而悔之急居【急居 此云菟岐于】則箸撞陰而薨 乃葬於大市 故時人號其墓 謂箸墓也

是墓者日也人作 夜也神作 故運大坂山石而造 則自山至于墓 人民相踵 以手遞傳而運焉 時人歌之曰

飮朋佐介珥 菟藝迺煩例屢 伊辭務邏塢 多誤辭珥固佐糜 固辭介氏務介茂

冬十月乙卯朔 詔群臣曰 今反者悉伏誅 畿內無事 唯海外荒俗 騷動未止 其四道將軍等 今急發之 丙子 將軍等共發路

十一年夏四月壬子朔己卯(BC87.04.28) 四道將軍 以平戎夷之狀奏焉 是歲 異俗多歸 國內安寧

十二年春三月丁丑朔丁亥(BC86.03.11) 詔 朕初承天位 獲保宗廟 明有所蔽 德不能綏 是以陰陽謬錯 寒暑失序 疫病多起 百姓蒙災 然今解罪改過 敦禮神祇 亦垂教而綏荒俗 舉兵以討不服 是以官無廢事 下無逸民 教化流行 衆庶樂業 異俗重譯來 海外既歸化 宜當此時 更校人民 令知長幼之次第 及課役之先後焉

秋九月甲辰朔己丑 始校人民 更科調役 此謂男之弭調 女之手末調也 是以 天神地祇共和享 而風雨順時 百穀用成 家給人足 天下大平矣 故稱謂御肇國天皇也

十七年秋七月丙午朔(BC81.07) 詔曰 船者天下之要用也 今海邊之民 由無船以甚苦步運 其令諸國俾造船舶 冬十月 始造船舶

卅十八年春正月己卯朔戊子(BC50.01.10) 天皇勅豐城命 活日尊曰 汝等二子 慈愛共齊 不知曷爲嗣 各宜夢 朕以夢占之 二皇子於是被命 淨沐而祈寐 各得夢也 會明 兄豐城命以夢辭奏于天皇曰 自登御諸山向東 而八迴弄槍 八迴擊刀 弟活日尊以夢辭奏言 自登御諸山之嶺 繩系互四方 逐食粟雀 則天皇相夢 謂二子曰 兄則一片向東 當治東國 弟是悉臨四方 宜繼朕位 四月戊申朔丙寅 立活日尊爲皇太子 以豐城命令治東 是上毛野君 下毛野君之始祖也

六十年秋七月丙申朔己酉(BC38.07.14) 詔群臣曰 武日照命【一云 武夷鳥 又云 天夷鳥】從天將來神寶 藏于出雲大神宮 是欲見焉 則遣矢田部造遠祖武諸隅【一書云 一名大母隅也】而使獻 當是時 出雲臣之遠祖出雲振根主于神寶 是往筑紫國而不遇矣 其弟飯入根則被皇命 以神寶 付弟甘美韓日狹與子鷺濡淳而貢上 既而出雲振根從筑紫還來之 聞神寶獻于朝廷 責其弟飯入根曰 數日當待 何恐之乎 輒許神寶 是以既經年月 猶懷恨忿有殺弟之志 仍欺弟曰 頃者於止屋淵多生萋 願共行欲見 則隨兄而往之 先是 兄竊作木刀 形似真刀 當時自佩之 弟佩真刀 共到淵頭 兄謂弟曰 淵水清冷 願欲共游泳 弟從兄言 各解佩刀置淵邊 沐於水中 乃兄先上陸 取弟真刀自佩 後弟驚而取兄木刀 共相擊矣 弟不得拔木刀 兄擊弟飯入根而殺之 故時人歌之曰 椰勾毛多菟 伊頭毛多鷄流餓 波鷄流多知 菟頭邏佐波磨枳 佐微那辭珥 阿波禮

於是甘美韓日狹 鷓濡淳 參向朝廷曲奏其狀

則遣吉備津彥與武渟河別 以誅出雲振根 故出雲臣等畏是事 不祭大神而有間

時丹波水上人 名水香戶邊 啓于皇太子活目尊曰 己子有小兒 而自然言之

玉菱鎮石 出雲人祭 眞種之甘美鏡 押羽振 甘美御神底寶御寶主 山河之水泳御魂 靜挂甘美御神 底寶御寶主也【菱 此云毛】

是非似小兒之言 若有託言乎 於是 皇太子奏于天皇 則勅之使祭

六十二年秋七月乙卯朔丙辰(BC36.07.02) 詔曰 農天下之大本也 民所恃以生也 今河內狹山埴田水少 是以 其國百姓怠於農事 其多開池溝 以寬民業 冬十月 造依網池

十一月 作荊坂池 反折池【一云 天皇居桑間宮造是三池也】

六十五年秋七月(BC33.07) 任那國遣蘇那曷叱知 令朝貢也 任那者 去筑紫國二千餘里 北阻海以在鷓林之西南

天皇踐祚六十八年冬十二月戊申朔壬子(BC30.12.05) 崩 時年百廿歲

明年秋八月甲辰朔甲寅 葬于山邊道上陵

日本書紀 卷第五